



يا كويت

ولو ضرب حسادج يززعز بالابدان
حنا بضربه نقسم الجمع نصين
وان كانهم وسط الميادين قشران
حنا القشرفينا بلياميادين
واذا الحميه فيهم حميه اخوان
حنا حميتنا حميه مجانيين
للهرج ميدان وللافعال ميدان
وللمجد درب وللشهامه عناوين
وللفخر ناس وللتواريخ ببيان
وللموت سوق وللتجارب براهين

حامد زيد

يا كويت تفداج الخرايط والاطوان
وتهون لامجادج تواريخ وسنين
وترخص على شانج توابيت واكفان
ويحلى على رملج نزيف الشرايين
يا كويت حنا للشدايد والاحزان
جيننا عشان نموت وانتي تعيشين
كرامتج تبقي وتحفظ وتنصان
وان ضاعت نفوس العرب وماتضيعين
الله خلقنا للعداوات عدوان
وصدورنا تبرى بطعن السكاكين

دار الكويت

دارنا دار عز وتخلف اللي هقيت
دار جود وكرامه دار مجد وكفاح
دار طيب ومعزه غصب لو ما رضيت
دونها الموت والله يا كسير الجناح
مير لولشي يا بنيه والعبي في كل بيت
واعتزي في عزوينه وصوت السلاح
وابشري في رجال(ن) تدبل الصيت صيت
قبل صوت العزاوي بارق العز لاح
يا عسى الله يحط العز في كل بيت
ويا عسى الدار دايم من نجاح لي نجاح
ابعلمك جملته حطها مانشيت
في صريح الكلام وبلا حروف الفصاح
والله اني كويتي وافتخر لمشيت
ورافعن راسي في داري وبحكم الصباح

عبدالكريم الجباري

يا عروق المحبه لو قصدت وحكيت
كل حرف(ن) اليا قلته من العين طاح
لو نويت القصايد والحكي ما قويت
والله اني مقصر والسماح السماح
فجر القلب حب(ن) يشبه الدانميت
حب دار الكويت وحب شيخي صباح
وانت ياللي تدم كويتنا مادريت
حصنها من حديد وكف اهلها رماح
والله انك من الحسد الدفين انعميت
من كثر حقد قلبك اكلتنا بالصياح
جيبلي شعب واحد مثل شعب الكويت
وجيبلي حكم واضح مثل حكم الصباح
اخذ النار لا نخلط مع النار زيت
مثل شرواك لو قرب الى النار زاح
انت قلبك مريض وميت(ن) لو حيت
كلمه الحي تطلق للقلب الصباح

